

2
ORATIO
ad Pontifices, Lon-
dini in æde Paulina, Anno
Dom. 1553. 17. Idus Aprilis
habita in Synodo publica:

Per Nicolaum Grimoaldum.



LONDINI:
Ex officina Typographica
HENRICI BYNNEMANI.

Anno Domini. 1583.

Cum gratia & privilegio Regie Maiestatis.





PRECATIVNCVLA.

DA Deus optime maxime tua dicta libenter ut audiamus: audita diligenter ut exequamur: tuo summo quod honori cedat, nostroque summo emolumento. **AMEN.**

PROPOSITIO.

CAuete vobis, & toti ouili, cui vos S. Spiritus præposuit Episcopos: ut regatis Ecclesiam Dei, quam ipse suo sanguine comparauit.

Actoru Apostolicoru è capite vicesimo.



VANQVAM
vos (clariss. Præsules, & diuinorum oraculorum interpretes) in optimarum artium sciētia educatos, & magno grauissimarum rerum usu cōfirmatos, abū dare oportet

bonis & salutaribus institutis: propter studiorum constantiam, magistrorum copiam, disputationum varietatem, ipsorumque adeo temporum fœlicitatem: tamen ut ille, vir sanctus sanè, quisquis fuit, Hebræos admonuit, sese ut mutuò quotidie cohortarentur:

A. y.

ne

ne quis eorum peccati fraude occallesceret: idem cum alias sæpè faciundum censuere maiores nostri: tum verò maxime in primo aditu ad causam tantā, quantam (volente Deo) nunc estis aggressuri: quò & læguentes commoueri, & currentes incitari possint. Quando enim confluxistis hoc tempore, de rebus non priuatis, sed publicis: ad gloriam non vestram, sed Christi: ad commoditatem non vnius, & alterius, sed totius regni Britannici pertinentibus: vti deliberationem habeatis, & aliquid in commune statuat: proponenda inprimis cœlestia, neque cogitanda terrestria sunt: ne damnetur à vobis diuina prouidentia: neue concursus tam celebris frustra factus esse videatur. Quantumvis licet excellatis inter alios, et per vos ipsi sapiatis: quoniam tamen ea nunquam dicuntur nimis, quæ nunquam discuntur satis: diuina dicta recognoscere cum altero, humana imbecillitati prodesse iudicabitis: præsertim cum dixisse Diuum Petrum intelligatis, semper se commonefacturum homines etiam natos, et in veritate fixos. Quinimò si spectatissimi viri Tobæi memoriā libèter vsurpatis: qui filium iussit auscultare cuiuslibet, dūmodo sanum ei consilium daret: vos, qui antehac audiendi assiduitate collegistis prudentiam tantam: minime nunc quidem in audiendi fastidio ponetis prudentiam vestram: sed quemadmodū in eadem naui sæpenumero periti gubernatores à vectoribus admoneri solent: ita etiam mihi dabitis eam veniam: vt non tam quæ sapio, quàm quæ video, vobis intelligentissimis viris demon-

demonstrem. Nec verò vos insequor hac oratione
 ut erudiam: quasi ego aut prudentior esse videri ve-
 lim, aut ad vestram vel doctrinam, vel sapientiam
 adferre me posse quicquam existimem: sed nimirum
 suadendo potius quam docendo, & rogando quam
 prescribendo agam vobiscum, & magnoperè conten-
 dam, ut opem apud vos, & veluti portum quendā,
 atq; perfugium literata pietas inuenire possit. Dum
 itaque vos Deo dicatos admoneo breuiter, quæ diui-
 narum rerum ratio postulabit: dumq; cohortor vos,
 quoad à me fieri potest, ut quam de vobis expectati-
 onem concitastis apud omnes & virtutis, & erudi-
 tionis, & sapientiae: hanc sustinere nauiter, & tu-
 eri possitis indies: si, quam cepistis, attentionem da-
 bitis, enī ar equidem pro virili, ut si non Rhetorica,
 popularisue Prudentia, Religio tamen, & nostra cō-
 munis mater Ecclesia me suum esse praconem, & a-
 lumnum asserat.

Quamobrem quod exercitatissimus Apostolus,
 & Christi Domini legatus experientissimus Ephesi-
 anos, ab eis digressurus, cōmonebat: ut exemplo suo
 ita docerent Euangelium, nemo ut periret vsq; iam
 eorum culpa: ac in accepta notitia Dei, & probata
 persuasione persisterent: ut sibi, suisq; cauerent ab
 aduersarijs: id nos inpraesentiarum dicendo renouā-
 dum, repetendumq; duximus: primum ut ex illius
 persona personas vestras effingere, & in vobis ipsis
 formam exprimere possitis ceterorum ministrorum:
 deinde ut commonstretis itidem vestris administra-

coribus eandem eiusdem operis, munerisq; functionē. Nobilissima profectò hæc Paulina concio est, & Episcopis, Ecclesiarumq; præfectis longè utilissima : & sine dubio dignissima, in quam, ceu normam, intueantur omnes : quamq; noctes, & dies animo, & cogitatione versent : ubi nimirum Paulus Asiaticis Præsulibus Conciones ita cōmendavit : ut omnis inde posteritas quasi præscriptum habeat, quid aut sequi, aut declinari oporteat. Verum enimverò hæc ipsa oratio cum sit prolixior, quàm ut tota recenseri, & pertractari possit : grauior autem, quàm ut præmitti aut negligi debeat : vnum quendam primariū locum, cætera suo ambitu comprehendentem assumo, qui est de diligenti, & continenti custodia, deq; adhibenda cautione, & prouisione contra versutias, fraudes, & nequitias maleficioforum. Quandoquidem & Dei benignitate, & vestris operis explosa iam insulsa superstitio est, & reiecti cultus præposterii : quando vera illa, & antiqua, & pura, & casta religio patefacta, cognita, recepta, & propè omnibus partibus est constituta : quid accomodatius huic nostro seculo ? quid conuenientiùs videtur Ecclesie Britannica ? quàm eandem ipsam religionem omni studio, cura, labore, diligentia cōlere, atq; retinere, & eiusdem propulsare inimicos, fouere defensores, curare commoditatem, tueri dignitatem. Hic ope vestra opus est, ô sacrorum Antistites : hic vestra res agitur : hic fungendum vobis munere & officio vestro : & in huius professionis aduersarios, cuiusquo

in Synodo publica.

5

iusque generis, atque ordinis, ita conandum, nitendum, agendum : omnes ut religiosi habeant, in quo vestra constantia, scientiaque singulari, & virtuti gratulentur. Iam quemadmodum non distractis animis, aut in vestra priuatim commoda respicientibus, sed coniunctis viribus, & communicatis consilijs transigenda res erit : sic quia communibus etiam precibus Deo summo supplicare decet : id non tam de more ut faciatis, quam amore impulsus, et charitate incensi, vos omnes vehementer oratos velim.

Omniño vniuersis mortalibus exposcite diuinam misericordiam : maximè autem Christianae Reip. ex cunctis gentibus in vnum corpus coagmentatae. Nominatim verò humili prece supremo patrono cōmendate Anglicam, & Hybernicae Ecclesiam : in eaque inprimis illustriss. florentissimumque Regem, Eduardum Sextum, principem eius ipsius secundum Deum moderatorem. Itemque D. Mariam, itemque D. Elisabetam, sorores Regias.

Benè precamini viris lectissimis, & honoratiss. Regi qui sunt à consilijs : etiam literatis, & nobilibus, & generosis hominibus, populoque Britannico : à Christoque contendite, eius ut spiritu agantur, & incitentur ad suum quisque munus exequendum.

Gratias habete benignissimo Patri de collata in eos beneficentia : qui faeliciter acta vita faelicem ad exitum peruenērunt, Eundem nos quoque spiritum votis omnibus expetamus : quò eisdem itineribus traducamur ad caelestem patriam : vbi cum Abrahamo regnemus,

regnemus, & Isaaco, & Iacobo, perpetuis, & sempiternis seculorum ætatibus.

Audite charissimi patres, & fratres: quotquot veremini Dominum Deum, audite. Exaudite Christum, ut exaudiri à Christo vultis: admittite seruum eius concionantem, ut & vos admitti precantes expetitis. Animadvertite distributores Euangelicæ sapientiæ, cuiusmodi tandem vos esse debeatis. Inspicite paternum affectum Pauli, & amore vehementissimo flagrantem animum: qui ubi coram adesse, & rem gerere ipse nequeat: ibi sic saltem representari sese cupit, ut in sermone sacro & patefaciendo, & custodiendo, posterius omnes eodem (quo ipse) ardenti studio tum sibi, tum suis prodesse possint.

Cauere sibi met ipsis primum, deinde ouili, & quidem toti iubet: causasque subnectit, & rationes grauissimas: dum quo autore, & quid in se, quantumque susceperint, & quem in finem condocet facit.

Cauete, inquit, vobis: cauete vobis, unde populus pendet, quos populus respicit: à quibus lucrum populus, emolumentumque cælestè captat: ne forte cum cæteris consulere debeatis, ipsi vobis deesse videamini.

Quomodo autem cauebitur? Sanè si disciplina recta usque conseruetur: quæ quidem ut Ephesijs, sic nostris hominibus primò percipienda est, postea diuulganda, tum continuanda, & à criminationibus maleuolorum vindicanda: tum etiam toto vitæ genere, & rebus, & factis exprimenda. Nemo itaque sustineat hanc difficilem prouinciam indoctus: constā-

tem,

tem & grauem dubius, aut opinione fluctuans, laboriosam dissolutus, plenam periculorum timidus, sacrosanctam neq, sacer, neq, sanctus.

Quid enim doctorem esse quenquam, doctrina qui caret? Speculatorem, qui cecus est? Exploratorem, qui ne vestigium quidem ponere vllum potest? Ministrum, qui decoram ministerij formam violat? Rectorem, qui nescit seipsum regere? Literarum homo rudis & imperitus, aut etiam vernaculus aliquis, et popularis doctor qua ratione tuebitur verum? quibus incitabit ad virtutem stimulis? quo pacto franget eorum impetus qui veritatis arcem oppugnare pergunt & demoliri moliuntur.

Hic considerate quaeso accuratius, quam pauci sint ex omni numero ministrorum, qui tanto munere dignum aliquid facere, & ostendere queant vias eas quae ad quietem & beatitudinem ferunt. Existunt (fateor) in hac celeberrima ciuitate aliquot, aliquando, qui Christum Christi q, fœdus aperiunt, in plebis q, conspectu ponunt. Rure interim populo seruitur ab insipientibus, et veritati ferè officium denegatur. Nescio quo fato fieri dicam (patres præclarissimi) etiã vobis præsidentibus, qui eruditionis gloria floretis, in quauis diocœsi, plures vt inueniantur legum sacrarum expertes sacrifici, quam intelligentes. Num vos etiamdum (Præsules) ad hunc honestissimum ordinem atq, pulcherrimum, illiberale, & impolitum genus hominum aggregatis? Atqui, horum ministeria vt vt leuicula plebi grata sunt: pijs sunt profectò, & moderatis hominibus

tot.

hominibus odiosa. Occupant operariorum loca, et tamen tabescunt otio: militum & tamen stertunt: buccinatorum, et tamen obmutescunt. Itaque populo inscio pares inscitia sunt: acceptumque beneficii compensant officio nullo: quodque homines industrios capere oporteret, fuci intercipiunt. Quis tam cecus est, qui haec non videat? quis tam durus, qui non deploret? Inter maxima praesidia omnium disciplinarum, & studiorum opportunitates summas regnat ignorantia: ingenium humanum exuitur, ferinum induitur, pro ratione rectoque iudicio, subit amentia, & insania: adeoque discendi sciendi, auiditas quam natura nobis iniecit, iam ferè vulgo nihili penditur. Ita haec regio licet aliqua ex parte collustretur luce diuini verbi: tamen maximam partem adhuc densa rerum ignoratione obruitur. Scientia si bonum est honore prosequendum: cur hodie contemnuntur eruditi? Annon quia pecunijs, & opibus affluentes homines, aut nullo, aut pertenui veritatis lumine illustrantur? Nam qui verum videt, discernit, ac iudicat, is hominem diuitiarum quidem inopem, at doctrinarum tamen diuitem cuius ignaro atque barbaro anteposit. Vestrarum hoc partium est (Pontifices) fouendo nares, repudiando rudes, efficere, ut vel vulgus hominum intelligat, quid sit bonis artibus excoli, ut doctrinam & capeffendam, & magni faciendam agnoscat: quo semper in rebus dubijs, & incertis, recurrat ad doctiores in perceptis, atque cognitis, habeat eis gratiam, per quos profecerit. Quemadmodum terra nisi agricolum accedat industria, iacet horrida & incul-

sa: sic spinas, tribulosq; producit animus: si non splen-
 descat spiritali disciplina, & tanquam excolatur.
 Quippe si nos, qui Apostolorum, qui Prophetarum qui
 optimorum patrum scripta quotidie legimus: vix ta- Chry
 men erumpentes comprimimus affectiones: vix frena-
 mus iram efferuescentem: vix inuidia facem extin-
 guimus: vix coercemus cupiditates: quam spem sa-
 lutis obtinebunt illi, qui non vtuntur ista medicina?
 neq; diuinis institutionibus auscultare solent. Quan-
 do etenim amabunt incognita? aut quando sectabun-
 tur, quae omnino nesciunt? Contra vero, quid iucun-
 dius esse potest? quid magis proprium Christiani ho-
 minis? quam mens bene de deo sentiens, & coelestem
 illam doctrinam edocta. Quod nisi iaciatur fundamē-
 tum verum, ipsa doctrina vera corruet. quicquid inae-
 dificabitur. Haec si contaminetur & vanis commen-
 titisue sententijs inquinetur. illico inundabunt errores
 & morbi, & existent quasi scopuli communis vitae id
 quod nimium, nimiumq; sensit aetas prior, cum tā im-
 mundi torrentes à Papa profluerent.

Sed statim vt apparuit quantum fuerat eminentia
 Schola Papistica, syncerum (est Deo gratia) minimeq;
 perfusum alieno sapore cultū secuti sumus. Restat, vt
 quod generatim legibus & in vniuersum precipitur:
 id seorsim doceatur à vobis, et particulatim à reliquis
 ministris. Ne torqueatur in vos argumentum quod
 Monachis obiectū Aquinas memorat. Docere nimi-
 rum, aut concionari non monacho cōuenire, quatenus
 est Monachus. Nam ex eo colligi posse, omnes Mona-

chos esse doctores: quod & falsum videretur et absurdum. Profecto enim Fratres, docendi munus ita vobis Presbyteris congruit, ut nihil magis proprium possit existere. Atque utinam essetis omnes Concionatores. Meliore loco, et longè quidem meliore, haberent se res humanae. Summus ille orbis Imperator unumquemque nostrum tanquam in statione definita collocavit ut quare quisque potest, defendamus omnes & societates, & ordines. Nos si possidemus ullas doctrinarum opes, in medium debemus, & liberaliter effundere: neque tam nobis, quam alijs semper sapere: & hoc religionis iter ingredientibus monstrare oportet viam, ac de nostro lumine lumen accendere: denique intelligendi cupidos prudentia nostra efficere prudentiores. Huiusmodi auxilium à nobis efflagitat uniuersa Patria: quod certè aut ferendum nobis erit, aut relinquendum hoc totum Theologiae nomen in quo studia tam diu nostra viguerunt. Qui non alit familiam suam, eum Matthaeus infidentem, Paulus quouis infidente deteriore nuncupat. Qui ergo Dei donum defraudat suo victu, quo illum nomine appellabimus? Cogitate vos esse eos unde sibi et populi, & Reges, & ciues omnes consiliū de maximis, grauissimisque rebus expetant. Loquendum est liberè & admonendum: debere Reges erudiri, re-

Psal. 2. Etiam ut sententiam ferre possint: debere principes viros conuenire, Domino ut inserviant: debere eos sanc-
ciendis, promulgandisque legibus ostendere, se fidem habere Deo, se Rempub. & quidem Christianam tueri, amplificare atque confirmare. Scilicet summum Deum
odisse

odisse malorum Ecclesiam, eosque qui non stant ab illius partibus, contrarios illi, et aduersarios esse, et planè perduellionis reos. Quò minor est rerum bonarum cura: quo maior est doctorum virorum paucitas eò vos hac ipsa defendite diligentius. In patriam et Rempublicam intuemini, (Patres) cui dati estis à Deo gubernatores, cuius incolumitas tacito quodam et vehemèti naturæ impulsu, vobis esse debet longè charissimam. Scelerati, et flagitiosi, quibus via patet ad Inferos, et miseras sempiternas: omnia referre solent ad vtilitatem propriam: nec facile possunt animum inducere, vt agant omninò aliquid gratuito. Vir pius tamen et religiosus, vt arbor facunda, et fructuosa, non commoditates suas querit: sed totus est in iuuantis alijs occupatus. Et quid (per immortalem Deum) tam diuinum, tam cælestè, tam beatum? quàm opem ferre supplicibus, solari miseros, dare pacem animis, liberare mentes metu, retinere homines in sanctimonia? Estis sal terræ, condite cæteros. Estis lux orbis, lucète alijs. Estis duces, præite viam reliquis. Estis Angeli Dei Opt. Max. nunciate ingentem lætitiā futuram toti populo. Estis diuinorum arcanorum dispensatores, scienter id facite atque fideliter. Reuerendi patres, Episcopi, facile est Episcoporum habere nomē, rem præstare profecto difficile. Vestro si vultis officio perfungi, oportebit docendo, monendo, emendando, suadendo, deterrendo, disputando, alijsque multiplicibus ministerijs, obire labores maximos, tolerare vigilias multas, excubare animis, cōcoquere longa tædia, pati

Luc. 2.

Cor. 4.

contumelias improborum, & versari etiam in vite discrimine. Et si nimis multos experiemini partim ingratos, partim morosos, partim hostili animo p̄ditos: tamen ut ignis vento, sic maledictis animus ad bene faciendum incendatur magis. Proficietur sanè sedulitate vestra, cum deus vobis vires suppeditaturus sit: et prospicietur vobis ipsis cōmodissimè, cum tanta vos in cælo merces maneat. Quare iam inde ab hoc tempore vsq; ad occasum vite, extremumq; spiritum, nunquam diuelli vos à tam præclaro instituto patiamini. Ut Vlisses ille solertissimus, Græcos duces iam abire volentes domum, & Troianam obsidionem ommittere, adhortatus esse dicitur, & oratione sua promouisse, ne infectis adhuc rebus proposito desisterent: sic ego vobis autor ero, ut quemadmodum contra pietatis hostes sæpè vos opposuistis: ita deinceps hortatu bonorum virorum, & rogatu, & sæpius, & seuerius opponatis. Non minor est virtus, quam quærere, parta tueri, ut verissimè Poeta cecinit. Idemq; nunc euenturū putate, quod olim inuictō Herculi accidisse legitur, qui cum vnum aliquod caput amputasset Hydræ, subinde cogebatur eundem repetere laborem: nouis subinde succrescentibus in ea bellua monstris.

Similis hominum priscorum, similis hodiè quoque nostra conditio est. Apostoli cum Iudæos à praua viuēdicatione reuocauerant, cumq; Gentes à cultu simulachrorum abduxerant: in Magum, in Ebionem, in Cerinthum, & eiusmodi hæreticos quanta sunt acrimonia, quanta dicendi contentione inuecti? Augu-
stinus,

stinus, Ambrosius, Hieronymus, & eius ordinis complures ex maioribus nostris, praterquam quod multa legerunt, docuerunt, scripserunt: nonne cum ijs conflictati sunt, quorum erant imbuta mentes perniciosis erroribus? Et nobis itidem, hac aetate, aliud ex alio negotium expectandum. Non ita multos ab hinc annos, in eo fuistis multi: ut, quos possetis ab operum nitelis auerteretis, à peregrinatione religionis ergò, à lucernis ad statuas affigendis, lustrali aquula, Missa Papistica, Purgatorio, & id genus alijs rebus: adeoq; nec sine multa opera diuulsistis homines à magnis illis monstris: nec sine multa industria pertraxistis ad sacrorum librorum lectitationem. Superest, (Patres) sicut antea decertatum est, cum superstitione: nunc ut cum impietate certetur: sicut antea disceptatum est de male collocatis operibus, nunc querela fiat de omisissis benefactis, & nusquam ferè comparentibus: sicut antea declamatum in idola, & cultus execrabiles: nunc in illum pestilentissimum Deastrum, Māmonem declamitetur. Nā quod tempus simile nostrorum temporum? Quot hodie solent alienas inuadere facultates? eatenus amplectuntur pleriq; religionem: quatenus quæstum ex ea, comodumq; faciant. Ut distrahuntur opes Ecclesiasticae? Sacerdotiorum quam frequens est nudinatio? Venalia templa sunt, venales Ecclesia. Libet exclamare: Non est (Improbe) domus, non fundus, non ager, homo est, quem emisti: hominem voras, vel potius hominum multitudinē. Siccine mores perdit circumuestiuntur emendationis titulo? Nam quid ad
hac

*hac dicemus, auditores optimi? Quæ hic est rerum
 facies? Videtur ista esse forma sana Reipublicæ? Quā
 multis præceptoribus, eorum culpa priuatur Ecclesia?
 qui victum & apparatus ipsis debitum præripiunt.
 Scholarū, & magistrorum, quibus carere Christianæ
 ciuitates nullo modo possunt, cur dilaniari sinitis ali-
 moniā et viscera? Quid de vobis iudicabit, atq; sen-
 tiet posteritas, tantam audaciam si non coercebitis?
 Quid iam nunc animi populum habere creditis? cum
 rapacitatis omnia plena conspiciant. Annon à maio-
 ribus longè alios in vsus conferebantur ista munera?
 Si sunt Ecclesiæ Bona, quod direptores fatentur ipsi:
 capienda erunt illis, qui nullam muneris Ecclesiastici
 partem nunquam obierunt? Quousq; conceditis hanc
 licentiam? quousq; comprobabitis, quæ auarissimus
 quisq; concupiuit? Si potestis parum, saltem cohibete
 assensiones, ne participetis eorum præuè facta. Si pote-
 stis amplius: extinguite crescentem flammam, ne de-
 inde victrix ad domorum & templorum tecta subsi-
 liat. Insatiabile monstrum est Auaritia: neq; sibi fre-
 nos inyci patitur Ambitio: præsertim, quando suc-
 ceditur ex sententia. Pecuniosis hominibus haud equi-
 dem inuideo: tantum admoneri volo, cuius sint æco-
 nomi, etiam atq; etiam vt meminerint: diuexatori-
 bus opto meliorem mentem. Opulentus est aliquis: ne
 respuite. Prædator est increpate. Habet sua: fruatur
 sedulo. Eripit aliena: tacere qui potestis? Christum e-
 surientem qui non pauperunt, si Gehennæ ignibus ad-
 iudicantur: quod demum illi supplicium lucent, qui fa-*

me Christum enecant? Lazarus si Diuitis accusator acerbo extitit, ab illo quidē affectus iniuria nulla: sed quòd illius bonis frui nō poterat, qua defensione vtetur, qui praterquā quòd de suo nihil impertire volūt, extorquent etiam aliena? Si laudi ducitur Pharaoni, suppeditasse sumptus in summa caritate annonae sacerdotibus: collaudabitis eos, qui non modò non suppeditant, sed suppeditatos adimunt?

Estne hoc leue quiddam? contaminare templum Domini, & ipsius fana profanare: deformare religionem, quam perpolire videri volumus: praesidia subtrahere studiorum: conuertere publica beneficia in priuatos, vsus dicam an abusus? Quid praedicabunt fratres nostri per omnem siue Angliam, siue Europam, siue etiam per orbem terrarum disseminati? Hocine Euangelium esse? Hos esse fructus tot concionum? Hanc restitutae religionis formam. Scitote (charissimi amici) spectaculum esse nos Deo, Angelis, hominibusq; & bonis, & malis, & imbecillis. Deus non patitur se irrideri: Angeli iam iam adsunt supplicium non suppetias lataturi: homines ingemiscunt boni, exultant improbi, offenduntur infirmi. Docete, docete omnes: hoc vnum inculcate iterum atque iterum: qui se Christianos numerari volunt, Christi vt dissimiles in viuendo esse nolint. A quum est, sinceram cognitionem sequatur sincera vita. Fastidit religionem, non amat, qui honestis eam moribus ornare negligit. Sed si vera potius, quàm dictis speciosa dicenda sunt: nunc planè ita viuatur à moralibus,

alibus, quasi cupiant hic omne genus voluptatum
exhaurire: quasi post mortem nihil sit, quod delectet
amplius. O scelerum furias, quibus exagitantur ho-
mines nefarii: o libidinum æstus, quibus impulsu ru-
unt præcipites in Tartara. An Deum res humanas
curare non existimant? Negent hoc licet ad tempus
homines voluptuarij: sentient tamen olim, sentient
adesse rebus suis acrem animaduersorem: & quàm
sit horribile in manus incidere viuientis Dei.

Patefacta nunc est veritas: discussa abierunt er-
rorum nebula: sacrae litera sunt è tenebris in lucem
eruta: excusationi deinceps nullus est relictus locus.
in omni genere disciplinarum, Deus & plura nobis
adiumenta profudit, & maiora, quàm repeti possunt
ex vlla superiorum temporum memoria. Sed hæc tam
excellencia, & inusitata beneficia contemnit etiam-
dum ingratisima Britannia: neq; puro pectore tam
propitium Deum colit: sed sibi potius inseruit, suisq;
commoditatibus. Quoties interim ad resipiscendum
inuitauit cælestis Pater? Annon ita nos conuocauit,
ut gallina singultu solet cõgregare suos pullos? Cùm
externis non detrimentose pugnatum à nobis est:
Bello intestino, nonne dexteras conuertimus in no-
stra ipsorum viscera? Peste, sudore, fame, quot millia
sunt absumpta? Nequicquam tamen hæc omnia. Nã
taliam quis est qui curet? Quotus quisque est, qui se
causam esse tantorum malorum suspicetur? Liberales
artes, morum integritatem, explanationem diuini
fæderis, auctoritatem Ecclesie, vim iustitiæ cernimus
propè-

propemodum nullius esse precij. Vt ego vereor? nenō
 virtuti amplius, neue eruditioni suus non sit futurus
 honos? Vt ego metuo? ne veteres obtrudat dolos de-
 nuō impudētissimus papa. Vt ego pertimesco? ne rur-
 sus ab oris nostris tā malē tractatas Musas abducatur
 Deus. Erunt, erunt exulceratissima tempora, si non
 cauebimus: retrō abibunt, & delabentur omnia. Ca-
 uendum, ne doctis, intelligentibusq; viris denudata
 Resp. destituatur ope, operaq; prudentium: & suis
 ipsa conatibus in exitium ruat. Cauendum, ne quod
 ferē sit in rebus humanis: & quod alijs gentibus acci-
 disse compertum est, idem nobis quoq; accidat: ne (in-
 quam) eximio gradu constituti deturbemur in pra-
 cipitium. Medea illa Poëtarum decantata carmini-
 bus, deplorans miseriam, & infortunia sua, videre
 se ait meliora quidem, & ea comprobare: sed dei eri-
 us omnino consilium sequi. Idem hac tempestate,
 vident certē multi, qui possit ex his malis eripi Ec-
 clesia: sedent tamen compressis manibus, secumq; (ut
 dicitur) viuunt. Verum enimvero magnam adhuc in
 Regia Maiestate, cuius incredibilis & virtus, &
 scientia est: magnam in Heroibus nonnullis, appri-
 mē fauentibus Euangelio: magnam in vobis. ad quos
 potissimum pertinet harum rerum curatio, spem ha-
 bemus, futurum sanē breui, ut videatur Ecclesia suā
 quandam stabilitatem esse consecuta.

Non est, quod vos deterreat à proposito: Defendi-
 tis eam, cuius inuicta vis est. Nam quid Ecclesia
 Dei potentius esse potest? Num mœnia? num propug-

macula? num arma vlla? Delentur hac diuturnitate temporis: cum illam ne Demones quidem expugnare possint. Ne quis autem ista nuda verba putet, re vobis testem dabo. Quam multi oppugnaverunt Ecclesiam? Ipsi tamen perierunt oppugnatores: hanc vero ad honores summos ascendisse constat. Ecclesia cum impugnatur, vincit: cum petitur insidijs, superat: cum figitur maledictis, afficiturque probris, nobilior evadit, atque splendidior. Veniat vobis in mentem, quam obnixè passim predicaverit Christum Paulus: quam multis, & magnis in periculis versatus fuerit. Si tanti est Evangelij vulgaratio: ut ob eam rem Prophetae, ut Apostoli, ut optimi quique vitam profunderè voluerint: non debebit à vobis summa fide vulgò enunciari? Hoc Moses, divinus homo, hoc populorum dux Iosua, hoc David & Rex, & Vates, hoc Solomon ille sapientissimus, Patriarcha, Propheta, viri denique amplissimi, & integerrimi hoc idem fecerunt. Imò Christus Iesus, filius præpotentis Dei, de gloria diuina se ipse depressit, quò diuinum hoc Evangelium, inambulans in terris, mortalibus exponeret. Quocircà doctrinam hanc minimè fucatam si arripuistis, arreptam demonstretis: demonstratam prohibete periculo: prohibitam periculo probitatis comendatione tuemini: quò sanctè, atque salutariter & cauissè nobis, & toti ouili consuluisse videamini.

Magnum nomen, magna dignitas, magna maiestas Episcopi est: quam appellationem tum dixit assumere se posse Cicero: cum ad eum totius in Provin-

cia

Iosf.

II. II.

Att.

cia gerendi negotij summa referebatur. Athenien-
ses eos nominauerunt Episcopos, qui mittebantur ad
vectigales, subditasq; ciuitates: vt quid in quaq; age-
retur, diligenter inspicerent, atque obseruarent. Iam Lyr.
sive reliquos ministros contineri voluit Paulus Epi-
scoporum nomine: ita vt quae principibus dicebantur
ea sibi quisq; dicta putaret inferior: sive eodem voca-
bulo, & titulo compellauit omnes: non multum labo-
ro: q; voce significatur, id an vos praestetis Episcopi.

In re quisque sua iudex, se viderit intus.

Si estis episcopi: circumspectate quid a famulis,
quid a liberis, quid a ministris Ecclesiasticis, quid a
Magistratibus, quid agatur a populo. Si estis explo-
ratores: exquirite Papistas, inuestigate Anabapti-
stas: Libertinos, & Haereticos omnes deprehendite,
corrigite, fugate, fundite. Si legati estis: imperata
peragite. Si custodes omnium: custodite Domini ve-
stri ouilia, & quidem integra: vt ne partim fouean-
tur, partim deserantur. Si pastores, pascite, quantum
in vobis est, greges vestros: nec vnquam parate fu-
gam, vbi venientem videtis lupum.

Ouis etiamsi sit stolidissimum animalculum, atque
simplicissimu: tamen pastoris agnoscit vocem, eumq;
subsequitur, ab eoq; subsidium querit, sese ipsa nec
adiutare potest, neque pascere, neq; sanare, nec a Lu-
pis defendere: tota pendet ab alieno praesidio. Est igitur
ea quidem infirma confirmanda, fracta obligan-
da, reuocanda vaga, quarendam perditam: ne forte vt
Israelitarum, sic Anglorum quoq; pastores illa Do-

1.3.

mini Iouæ vocem audiant: Heu, qui vos ipsos pascitis: nonne oues pascere pastorum est? Adipem comedetis, lanam induetis, mactabitis opima: oues non pascetis? Ne viuam (inquit Dominus I O V A) ni, quoniam oues mea præda, pastuique sunt omnibus bestiis agrestibus, defectu pastoris: neque meas oues conquirunt pascores mei: pascuntque semetipsos, non itidem ouiculas: hanc ob rem ipsos ego petam: ouesque meas ab eis reposcam: eosque omnium pastione abdicabo. Quapropter vestrum peruestigate gregem: liberate ex luporum faucibus, ne sint eis pabulo: in læta pascua deducite: in bona stabula reducite: curate vestram ut agnoscant vocem: videte, ne optima pabula pedibus obterantur, neue turbentur aqua limpidissima: videte per ianuam ne intraueritis in ouile, an aliam transcenderitis: videte demum, ne Christum postponatis lucro: neue ab eo rapiatis oues, easque dispergatis, atque profligetis. Nam hoc quidem ouile non est ouile, sed Ecclesia: non hominis pastoris, sed omnipotentis Dei: cuius imperio (nisi si quis mercenarius, aut prædo sit) parebitis.

Iactent Monarchæ suam potentiam, Iudæi ceremonias, Græci sapientiam: nos verò Christiani Christi sanctissimum Spiritum vnicè admiremur. Hic est, qui suggerit nobis omnem veritatem, qui animis nostris de salute sempiterna spem indubitatam facit. Huic bonitate, fatebimur immensum beneficium nos esse consecutos: si vel Philosophorum, atque Poetarum horrendos lapsus, erroresque

quæ consideremus. Ille, ille Spiritus, qui suo numine replet vniuersa, & rebus omnibus inspirat vitam: cuius vi coheret hæc mundi totius machina: qui æterno Patri coæuum filium fœdere immortali iungit: qui imperitis hominibus ora repente afflata soluit suis radijs, & ita soluit, vt vox eadem audiretur cœtum sonare linguis, & Christum per orbem terrarum stupefactis gentibus ostendere: hic vos elegit: hic vos asciuit, atque cooptauit in Ecclesiam suam: hic vos ouili suo præposuit. Nam siue parentes, siue amici, siue Magistratus ad hanc vos dignitatem & amplitudinem euexerunt: non ignoratis id fecisse præpotentem Deum: qui nos & parentibus obsequentes, & amicis morigeros, & magistratibus voluit esse subditos: nisi forte obrepserit aliquis ad honores aut cupiditate & ambitione sua, aut errore hominum, aut fauore. Quando igitur vigilantissimo seruitis, potentissimoq; Principi: quicquid erit incogitantia, quicquid cessationis, quicquid ignauia: nõ committetur in hominem, sed in ipsum Deum, & communem nostrum Dominum. Ecquis autem famulus rerum suarum curam gerit, priusquam herilia negotia confecerit?

Agite, ô Presides & procuratores Ecclesie, per Deum immortalem agite: in tanta celebritate cœtus efficite, ne habeant quod conquerantur ouicula: ne destituta, & nullis præsidys munita sint ouilia: ne s. ipse Spiritus coarguat vecordiam vestram: in quæ peccasse, non vos præterit, quàm sit graue, & ex-

20,

crandum. . Id vt possitis effugere, perpendite, quos
 esse vos in terris voluerit Deus: quid requirat à vo-
 bis: quid muneris iniunxerit: hoc videlicet, Dei
 Concionem vt gubernetis: vcl (quod vult Græci
 verbi vis) pascendo vt regatis, regendo vt pascatis
 Ecclesiam. Præsentes dum estis, præsenti muneri
 satisfacite, vt Paulus fecit: futura Deo, Deiq; nun-
 cys curanda relinquire. Domino seruite cum omni
 modestia, vt Paulus. Quicquid erit vtile, præstate
 populo vt Paulus. Instituite homines tum publicè,
 tum intra parietes, vt Paulus. Docete correctionem
 morum, & Christo habendam fidem, vt Paulus. Vt
 Paulus nihil pensi habuit, neq; tanti vitam fecit, dū
 alacriter suum cursum conficeret: sic diuina gratia
 vos Euangelium testificamini. Sicut Paulus conte-
 status est se ab omnium pernicie insontem esse, &
 Iudæis, atq; Græcis omne Dei declarasse consilium:
 item vos Anglis cœlestia misteria publicate. Deni-
 que sicut Paulus præmuniuit Ephesios, & in-
 struxit aduersus insectatores: sic vos continentibus
 studijs & perenni labore, tuemini doctrinam solidā:
 & armati semper ab omni parte quasi quasdam ex-
 cubias agite: vt sarta tecta conseruetur Ecclesia Bri-
 tannica.

Si quod vnquam fuit tempus, (charissimi Patres,) &
 fratres, quo prudenti consilio & graui opus ha-
 buit Anglia: hoc ipsum esse profecto cernimus, ne tā
 sublimi ē gradu decidat cum ingenti dedecore: neue
 exultas tantoperē disciplinas amittat, suo maximo
 malo.

malo: neue hanc lucem, splendoremq; diuini verbi ne-
 gligat, & ita demum in erumnas miserabiles ruat.
 Conuentus iste vester vt omnibus innotuit: ita quor-
 sum pertineat tandem, quosue fructus sit allaturus,
 auidissime ab omnibus expectatur. Faxit propitius
 Deus, vt exeat magnum aliquid, & conspiciuum, in
 quod libenter tota respiciat posteritas. Omnino qua-
 les erunt exitus, qualia vestra opera: tales vos ipsos
 esse & sentient homines, & predicabunt. Itaq; iam
 nunc penes vos erit, vestroq; in arbitrio positum: aut
 Ecclesie Proceres praeclarissimos, aut custodes iner-
 tes, & negligentes in perpetuum appellari. Quapro-
 pter excitate spiritus: erigite capita: aures, oculos, a-
 nimosq; aduertite: omnia collustrate: in toto regno re-
 ligionem confirmate: literas, leges, virtutesq; conseri-
 te. Apud Romanos, in Senatu quod primo propone-
 batur, id, teste Varrone, ad religionem pertinebat:
 neque vlla causa, quamuis ampla, & expedita, hunc
 morem anteuertebat. Et quidem finis nostrae Politiae
 non est positus in alendis, curandisq; corporibus: sed
 multo magis in pascendis, reficiendisq; caelesti alimo-
 nia mentibus. Prohibebunt Primates edictis publi-
 cis adulteria, furta, caedesq; corporum: non etiam spi-
 ritalem fornicationem? non etiam animarum pestes?
 At vos si in speculis forte stetistis, Episcopi: iamdu-
 dum sentire potuistis pleraq; in Ecclesijs agi raptim,
 atque turbate: sine more, sine ordine, sine sancto metu,
 sine sacrarum rerum honore, & cultu. Quid ergo?
 quid existimatis (grauissimi viri) quid existimatis?

Desiderari nullas leges Ecclesiasticas? nullam castigationem fraternam? nullam diligentiorum rationem ministerij?

Videmus Platonem, Lycurgum, Solonem, Numam Pompilium, aliosq; nonnullos praecepisse saltem ea de religione, quam sua quadam opinione sibi finxerant. Quanto plus firmitudinis apud nos est? quod praeceptionibus corroboretur, & in omnes vitae partes accommodetur. Cum rerum omnium vel minutissimarum ordo quidam sit: quo sublato, & euerso, consistere rerum natura nequeat: multo eum magis elucere debere in diuinis rebus existimo. Nam ut modus, & ordo reuerentiam prouocabit: ita confusio, & perturbatio contemptum adferet.

Præterea, non vos vrent, argentq; peccata publica: cum auditis reposci à vobis pereuntium sanguine? Si quis pereat, sua culpa pereat, non vestra. Necesse habetis, p ea conditione in qua estis positi: (ne plectamini grauius ipsis maleficis) maleficia palam patrata palam arguere: neque personarum in ea re discrimen habere ullum. Utinam reuiuiscat in vobis Diuus Chrysostomus: & ut ille præscripsit suis, sic velit vos vestris: quò à sacris arceantur homines aperte improbi. Prohibe (inquit) audacter. Hominem si reformidaueris, & habebit ipse te pro ludibrio, & irritabitur ad peiora. Est tibi dominus maior: quem si metueris, & mortalibus venerandus eris, et immortalis Deo gratus. Quod si tu non audes: ad me adducito. Non patiar hac audere quenquam. Anima deficiat prius, quam

indignis modis Domini cruorem porrigam. Equidem profundam potius meum ipsius sanguinē, quā aliter atque decet exhibeam illum tam tremendum sanguinem. Melius est multo vita priuari, propter Deum: quā propter vitam ipso Deo. Hæc ille: hæc vos mysteriorum ministri maximorum attendere, & curare debetis maximoperè. Si Ecclesiā benè audire vultis: si diuinam vindictam prohibere cupitis: quorumcunque hominum insanabile ingenium videtur esse: vos, cum excluderitis eos è Christianorum conuenticulo: docebitis populum ea sancta credere, quæ ab istis violari solent. Christus (in quo Deus erat, mundūq; recōciliauit sibi) Concionē suam in honore vult haberi: quā adeo complexus est, vt pro ea seipsum hostiam dediderit Deo. Itaq; nihil debens ipse, morte sua, redemit nostra debita. Quæ coempta sunt, ea seruari diligenter solent: quæ magno precio, diligentius: quæ maximo, diligentissime. Iesus vinctus Dei, & idem dominus vester comparauit Ecclesiam, cuius estis Ecclesiastæ: non paruo, sed incomparabili precio, nimirum suo sanguine. An vero leues daturus est ille pœnas: qui vel incuria, vel pigritia sua merces tam pretiosas perdiderit? Quid igitur? Christus ad conseruandam Ecclesiam non dubitauit animam amittere: & nos fratrum salutem contemnimus? Christus cruore fuso, in gratiam recepit inimicos: & nos homines iam amicos factos non retinebimus? Christus nihil non egit nostri studio: nos nullam grati animi significationem prebebimus? Quid non

Cor. 2. 5.
Ephes. 5

iam fieri, sed omninò dici: nec iam dici, sed omninò cogitari potuit humanius? quid nostri amantius? Vtinam hæc Christi charitas tam in pectoribus nostris ardeat, quàm vehementer in auribus sonat. Idem in vobis quos amores excitauerit sui, haudquaquàm est difficile iudicium: quoniam eum si amatis, pascetis eius agnos.

Vigilate Patres, vigilate fratres: quò plus imminet periculi, eò diligentius, attentiusq; vigilate. Nò dormit Diabolus: semper aduersum nos irritat suos. Si vel absitis, vel agatis alias res, vel in otio langueatis: ingerent se lupi graues. Velut in caulas custodibus destitutas: qui gregibus nihil parcent, sed miseras ouiculas terent, trahent, discerpent. Perversi doctores ingruent, & tyranni etiam, atq; vastatores. Adeoq; ex ijs ipsis (quod est indignissimum) orientur lupi, vt vaticinatur Paulus: qui Christi se discipulos, & Ecclesie columnina esse iactitant. Istiusmodi sunt Papistæ, qui plebi vsque insusurrant veteres, & aniles fabulas: qui in optimarum frugum copia, porcorum siliquis populum vesci volunt: qui lucentè lampada sub modio tegunt: qui pugnant acriter, & id agunt, vt perpetuò sibi liceat iacere, nec ad vllum modum peruenire. Neque desunt fortassis Anabaptistæ: qui peruertunt omnem ordinem, & nimium quantum metuendi Libertini sunt: quibus quicquid libet, licet.

Contra horum omnium luporum incursus, quam paratis defensionem, Patres? & quos tandem oppo-

nitis aduersarios? O rem miseram, atque miserandā. Ad Ecclesiarum procurationem admouentur non patroni, tutores, defensores: sed prædones, hostes, proditores: qui non quàm ipsi boni sint, curant: sed quàm bonum sacerdotium. Ad sacrum, ad publicum, operosumq; negotium adhibentur indocti, adhibentur pigri & quod turpissimum est, approbantur. Mercedem ipsam ministrorum bonorum propriam, quid si assequantur idiotæ? quid si mulierculæ? quid si pueri? quid, si homines prorsus illiterati? Mirer, si est vana ferè vestra, pontifices, apud plebem autoritas? Vos eleuatis eam. Quippè quia muneribus, & emolumentis Ecclesiasticis, dum vultis vobis deuincire nescio quos ex alieno genere, atque ordine: & efficitis planè, vt minus possitis ipsi, & estis maiori despicatui. Qui alijs exemplo esse debetis: aliorum exemplo peccabitis potius, quàm alij vestro rectè faciant? His ego iucundiora, & plausibilia dictu alia esse scio: sed me vera, & seria pro iucundis, & plausibilibus loqui etsi meum ingenium non iuberet, necessitas cogit.

Cauete à lupis: si non temporibus admoniti, at me iam admonente: si non me, at Paulo: si non Paulo, at Christo Deo, Deiq; Spiritu. Cauete à lupis: quibus peculiaris est voracitas, & inexplebilis ingluuies. Cauete à vulpibus: quorum est vndecunque conuerrere, & ad se rapere. Cauete à Daemonum caterua: qui iā hominibus abutuntur ad omnia.

Amplissimi patres, charissimiq; fratres, si in ista curricula pertrahere vos potest Paulus exemplo suo:

si hortatibus, & admonitionibus eius acquiescitis : si communem hominum salutem priuatis paucorum utilitatibus anteponitis: si praefectura vestra auctore S. Spiritum agnoscitis: Christi gloria si studetis: si sanguinis eius asperersionem colitis: populum exemplo vestro sic confirmate, doctrina instituite, ope subleuate, prudentia regite, autoritate tuemini: ut vobis gratulemur, literis laetemur, patriae gaudeamus, religione perpetuanda mirifice oblectemur. Suspiciate ducem & vitam, & fortunam vestram : despiciate res humanas ipsa inanitate inaniore : inspicite vobis assignata munera : perspicite pestiferam corruptelam horum temporum: respiciate demum ad posteros. Illis puram, minimeque depravatam disciplinam Euangelij quasi per manus tradite: ad illos, introductam nostris temporibus, pulcherrimam tractationem bonarum artium, auctam & illustratam ordine transmittite.

Sed proculdubio nisi constitutatur aliquid certi, & existat quaedam tutela doctorum hominum: secutura sunt horrendae tenebrae: secutura barbaries, atque seruitus: e quibus luculento beneficio Dei non ita pridem erepti sumus. Videtis, Euangelij publicatio quanta cura ipsi Deo fuerit : qui hoc nomine de caelo demisit filium: nec potestis ignorare, quam liberaliter opes cumulateque contulerint ad sustentandos eruditos viros etiam Principes, & Reges magni, atque memorabiles.

Nunc autem quaeso, humanissimi, atque optimi viri, spectemus (si absque nimio dolore possumus) Ecclesiam
sta-

statum. Nonne populo miserum, vobis inuidiosum, religioni inimicum, Deo inuisum, sic subverti ministerium Ecclesiasticum? Potuit corrupta Ecclesia vigere, seruatis opibus: emendata non poterit? Siccine tractamur ab ijs, quibus tam benè fecimus: vt, cum gratiam restituta religioni debitam expectemus, in hacce miseras incurramus? Vt tum est eò videlicet, nihil vt moueant vehementissima verba Concionatorum? nihil vt inflectent supplicationes miserorum? O, quam ego faciem Ecclesie futura videor videre? Vagabitur, & errabit grex ouium dissipatus. Non erit, qui det pabulū suo tēpore famelicis. Morbi grassabuntur & plurimi, & fœdissimi. Consequentur admiranda, & commiseranda pecudum lues.

Iam iam poterit non sine caussa sic inclamare Deum Britannica Ecclesia: Ioua, Ioua, ser opem serua me obsecro. Aut sine me isthinc aliò transferri: aut ne patere diutiùs has indignitates. O terram illā beatam, quæ Christi Ecclesiam exceperit: hanc ingratam, si eiecerit: miseram, si amiserit. Sed certè discedentem reuocat ipsa Patria: quæ sic vobiscum, Pontifices, agit, & quodammodo tacita loquitur.

Quid agitur. Antistites? Quam indagastis, nati estis, introduxistis, protulistis, commendauistis: eam nunc religionem non conseruabitis? Tam citò distrahetur à me, cui modò restituta est? Vos, vos appello, doctissimi viri: qui tam diu versati estis in Ecclesia redintegrandā: qui tantoperè pugnastis Romano cum Antichristo: vobis nō modò inspectanti-

bus, sed etiam assentientibus, labefactabitur Ecclesia vera? debilitabitur perfecta religio? O tempora, o mores. Reuocare in hanc regionem potuistis Euangelium: retinere non potestis? Nam ubi praefecti? ubi doctores? ubi administri? quibus sublati, nequibit illud diu consistere.

Huic quærimonia (splendidiss. atq. ornatiss. viri) occurrere: & subuenire pro viribus laboranti Patriæ. Consolamini afflictos: dimiccate cum improbis: reuocate à flagitio: intercludite omnes luporum, et hostium vias.

Quod bonum, fœlix, faustumq. sit vobis, rei publicæ: iam Senatus conuenit frequens, summum huiusce regni consilium. Iam retundatur ambitiosorum hominum in occupandis alienis possessionibus licentia. Refutetur, & coerceatur Papiſtarum & Hæreticorum turba. Remoueantur potius pastores isti, quàm eiusdè generis admoueantur alij: melius pasti, quàm pascentes: curati melius, quàm curantes: qui tondent oues, non abunt: nudant, non operiunt: exspoliant, non exornant. mactant, non fouent. Iura describantur Ecclesiastica: animaduertatur in scelestos: sua sint bonis præmia: detur eruditis Ecclesiarum administratio: locupletentur gymnasia, fiant quæ idoneorum ministrorum seminaria, quorum hodiè penuria periculosissimè laboratur. Ista sunt religionis ornamenta: ista sunt pietatis argumenta: isthuc est Euangelium restituere: isthuc est rempub. gerere: ista si fiant, placabitur Deus: triumphabunt Angeli: effe-

rentur

ventur latitia boni: pudefient improbi: infirmi reddē-
tur absolutiores: Satan præ dolore crepabit medius.
Capistis prouehere religionem rectam: tenete fortiter
generosum captum, & alacri spiritu persequimini.
O præclara Perseuerantia, quæ, & qualia tu tecum
apportas bona? Quàm pulchrè agitur in Ecclesijs, v-
bi tu locum habes? Quanta ingeniorum adiutamēta:
quantas in sacris literis progressiones: quàm egregios
laborum fructus: quàm constantiam in opinionibus,
concinnitatem in moribus, grauitatem in verbis, ho-
nestatem in omni vita semper attulisti?

Veniat in mentem, vestra quid polliceatur profe-
ssio: quid noti, quid ignoti, quid expectent à vobis o-
mnes: quid Regia Maiestas, quid eius Cōsiliarij, quid
ipsa Respub. postulet. A vobis plebs omnis cum sobole
sua pendet: à vobis doceri expetit: vos quemadmodū
vixeritis, inquirent posteri: vos quales fue-
ritis, Fama & in hac vita, & post fatum euul-
gabit: vobis talenta tradita repetet recipietq; Domi-
nus cum fœnore. Reddetis aliquando rationem, pasto-
res, reddetis rationem principi pastorum Christo. Væ
vobis, si aut ignauia vestra, aut vitio pusilli animi,
aut quouis alio modo perdideritis oniculas: quarum
caussa, mortem ipse Christus obiit. Date diligenter
operam: timete mortaliū neminem: omnium & iu-
dicem, & vindicem timete: qui & corpus, & animā
potest precipitare in Tartara. Ne mortem metuite,
vnde transitur ad vitam: peccatum metuite, mortis
eternæ causam. Labentem populum ad decus excita-

te: ab errore deducite: ad omne officij genus instruite: sic in studium religionis incumbite: ut & vobis saluti, & Regiæ Maiestati gloriæ, & Britannia ornameto, & Reip. Christiana præsidio, & amicis voluptati, & inimicis terrori, et posteris admirationi, & Deo, Dominoq; honori esse possitis. Ad extremum, si qua desint: orandus erit ille, qui affatim, & abunde sufficiet omnia.

Deus, ô noster Deus : da, ut flante Fauonio tui Spiritus, vela dent gubernatores veram ad pietatem exercendam: puramq; religionem propagandam, atq; stabiliendam. Christe pastor, & conseruator: tu mentem tuam, qua quondam ouium necessitatibus dedisti animam : da pastoribus, atq; rectoribus Anglicis: ut postquam præclare gesserint sua munera : illam tuam audiant dulcissimam vocem: Rectè, ô serui boni, et fideles: in paucis qui fuistis fidi, ego multis præficiam vos. Ingremini in Domini vestri voluptatem.

Hanc nobis voluptatem, paratam primum ab orbe condito, deinde summo pretio comparatam, sui Christi respectu concedat celestis Pater: cuius est regnum, & potentia, & gloria, in omnem æui æternitatem. A-

men.

M E N.

FINIS.

